



**Khushbū yā Badbū?**

**Saphal Zindagī kā Rāz**

*ḳhushbū yā badbū? saphal zindagī kā rāz*

Fragrance or a Foul Odour? The Secret of a  
Successful Life

by Bakhtullah

[*Ao, Khud Dekh Lo 22*]

(Urdu—Roman script)

© 2024 [www.chashmamedia.org](http://www.chashmamedia.org)

*published and printed by*

Good Word, New Delhi

The title cover is a collage of Clker-Free-Vector-Images <https://pixabay.com/vectors/flask-decanter-beaker-chemistry-30532/>;  
499798  
<https://pixabay.com/illustrations/smoke-colors-wallpaper-662747/>.

Bible quotations are from UGV.

*for enquiries or to request more copies:*

[askandanswer786@gmail.com](mailto:askandanswer786@gmail.com)

## **Fahrist**

<b>Marthā kā-sā Josh Apnāo</b>	<b>2</b>
<b>Mariyam Jaise Dīwānā Ho Jāo</b>	<b>5</b>
<b>Apnī Harkatoñ se Kḥushbū Phailāo</b>	<b>8</b>
<b>Muhabbat se Kḥālī Soch se Dūr Raho</b>	<b>11</b>
<b>Merā Kyā Jawāb Hai?</b>	<b>14</b>
<b>Injīl, Yūhannā 12:1-11</b>	<b>15</b>

Har insān ke dil meñ ek gahrī ḡhāhish hotī hai. ḡhāhish kyā hai? Yih ki merī zindagī saphal ho, merā jīwan kāmyāb nikle. Merī zindagī kis tarah kāmyāb ho saktī hai? Yūhannā 12 meñ iskā ajīb-o-ḡharīb jawāb miltā hai. Ek jawāb jo ām soch se kahīñ dūr hai. Āie ham is par ḡhaur karen.

Lāzar ko murdoñ meñ se zindā karne ke bād Īsā Masīh Lāzar ke gāñw banām Bait-anīyāh se chalā gayā thā.

► *Wuh kyon chalā gayā thā?*

Us ke muḡhālīf yih mojizā dekhkar ḡhush nahīñ the. Is ke ulṡ wuh us ke ḡhilāf sāzishēñ karne lage. Īsā Masīh un ke mansūbe jāntā thā islie wuh chalā gayā. Use mālūm to thā ki use pakaṛā jāegā. Lekin wuh yih bhī jāntā thā ki ab tak ḡhidmat ke kuchh din bāqī rah gae haiñ.

Yih bāt zahn meñ rakhkar wuh kuchh der ke lie kahīñ aur k̄hidmat karne lagā. Lekin ek din wuh dubārā Bait-aniyāh pahuñchā. Yih k̄habr sūkhe hue jangal meñ āg kī tarah phail gai. Gāñw ke log itne k̄hush hue ki unhoñ ne Īsā Masīh ko dāwat dekar khāne kā k̄hās intazām kiyā.

Ab dhyān deñ: Yih dāwat Lāzar kī taraf se nahīñ thī. Kisī aur ne apne ghar meñ yih intazām karwāyā. To bhī Marthā ākar madad karne meñ juṭ gai. Yih bāt hamēñ ek ahm sabaq sikhātī hai. Yih ki

### **Marthā kā-sā Josh Apnāo**

- ▶ *Marthā kyon Īsā Masīh kī k̄hidmat karne lagī hālāñki yih ziyāfat us ke apne ghar meñ nahīñ thī?*  
Jise Īsā Masīh kī muhabbat pakarkar shāgird banā letī hai wuh k̄hushī se k̄hidmat kartā hai. Use apnī hī izzat kī fikr nahīñ rahtī.
- ▶ *To Marthā itne josh se kyon is k̄hidmat meñ lag gai?*  
Islie ki wuh Īsā Masīh ke lie shadīd muhabbat mahsūs kartī thī. Koī bhī kām bojh nahīñ lagtā thā.

Ek aurat kā zikr hai jo apne shauhar se nafrat rakhtī thī. Wuh har farz adā to kartī thī, magar baṛī mushkil se. Misāl ke taur par bīwī ko rozānā chhīh baje subh tak uskā nāshtā taiyār rakhnā thā. Is qism kā kām use hameshā zulm aur zyādatī lagtā thā aur wuh us ke taht kuṛhtī rahtī thī.

Ek din shauhar wafāt pā gayā, aur hote hote aurat kī kisī aur se shādī huī. Nayā shauhar halīm thā, aur un kā āpas meñ pyār baṛhtā gayā. Ek din bīwī ko almārī se ek purānī kāpī milī jis meñ purāne shauhar ke tamām hukm darj the. Us meñ yih bhī likhā thā ki bīwī ko har sūrat meñ 6 baje subh tak breakfast taiyār rakhnā hai. Tab aurat ko ek ajīb sī bāt mahsūs huī. Us ne sochā, ab bhī main apne shauhar ke lie subh 6 baje nāshtā banātī hūñ. Ab bhī main yih sāre hukm pūre kartī hūñ. Lekin mainne kabhī bhī diqqat mahsūs na kī. Ab to main is se zyādā mushkil kām kartī hūñ.

► *Āpkā kyā ḳhyāl hai. Us ne kyon kabhī diqqat mahsūs nahīn kī thī?*

Islie ki bīwī apne nae shauhar se shadīd muhabbat rakhtī thī. Muhabbat ke bāis koī bhī kām mushkil nahīn lagtā thā.

Dekho, Marthā us aurat kī tarah thī: Wuh apne āqā ko itnī pyār kartī thī ki kisī bhī kām meñ diqqat mahsūs nahīn hotī thī. Ab to wuh yih kām karte waqt barī khushī mahsūs kartī thī. Yahān tak ki wuh dūsre ke ghar meñ gai tāki apne āqā kī khidmat kare.

Yahī Īsā Masīh aur shariyat meñ farq hai: Shariyat hameñ batātī rahtī hai ki hameñ kyā karnā hai. Aur ham jānte bhī haiñ ki us ke hukm sahī haiñ. Lekin ham hameshā kuṛhte rahte haiñ. Is ke muqābale meñ jab Īsā Masīh hamāre dilon meñ bastā hai to ham yih hukm khushī se saranjām dete haiñ.

► *Kyon?*

Islie ki uskī muhabbat aur huzūrī hamāre andar rahtī hai. Tab ham khud baḥud yih kām karnā

chāhte haiñ, aur ham dukh mahsūs karte haiñ  
jab kabhī is meñ fail ho jāte haiñ.

► *Kyā āpke dil meñ yih muhabbat bastī hai? Kyā Īsā  
Masīh āpke dil meñ bastā hai?*

Jab wuh hamāre dil meñ bastā hai to hameñ  
sachmuch āzādī hāsil hai—wuh āzādī jo sirf aur  
sirf Injīl kī ḡhushḡhabrī se miltī hai.

Lāzar bhī khāne meñ sharīk thā. Ab tak wuh logoñ  
ke dhyān kā markaz rahā thā. Ab tak sab hairān  
the ki kafan meñ liptā huā yih ādmī kis tarah qabr  
meñ se niklā thā. Tab ek wāqiyā huā jo hameñ ek  
aur sabaq sikhātā hai. Yih ki

### **Mariyam Jaise Dīwānā Ho Jāo**

Achānak Lāzar aur Marthā kī bahn Mariyam  
kamre meñ dāḡhil huī. Wuh be-chain thī. Us ke  
hāth meñ nihāyat qīmatī itr kā itrdān thā. Us ne  
sāre mehmānoñ ke sāmne itrdān kā muñh toḡkar  
pūrā itr ustād par unḡel diyā. Phir pānwoñ par  
ṡapakte tel ko apne bāloñ se poñchhkar ḡhushḡ  
kiyā.



Mezbān hakkā-bakkā rah gae. Yih kaisī harkat thī? Hān, yih thī kaisī harkat? Yahān kī tarah khawātīn apne bāloñ ko khule kabhī nahīn rakhti thīn. Phir kisī ke pānwoñ ko apne bāloñ se poñchhnā—aisī harkat koī nahīn kartā thā. Ġhulām bhī aisī harkat nahīn karte the. Lekin Mariyam ko koī parwāh nahīn thī.

► *Mariyam ko parwāh kyon nahīn thī?*

Aisā kām sirf wuh kartā hai jo kisī ke bāre meñ itnā pāgal hai ki use dūsroñ kī parwāh hī nahīn rahti. Ek aur mauqe par Mariyam Īsā Masīh kī bātoñ se is qadr muta’assir huī thī ki Marthā ko use jhīrkī denī paṛī. Kyoñki ustād kī bātoñ ke jādū meñ ākar wuh mezbānoñ kī khidmat karnā bhūl gai thī. Īsā Masīh kī huzūrī yoñ us ke dimāgh par baiṭh gai thī ki wuh hil bhī nahīn saktī thī.

► *Kyā āp Īsā Masīh ke bāis is tarah pāgal ho gae haiñ?*

Ek aur bāt Mariyam ke zahn mein zarūr thī. Isrāil mein tīn qism ke logoñ ke sar par tel unḍelā jātā thā—bādshāh par, nabī par aur imām par.

► *Tel kyon un ke sar par unḍelā jātā thā?*

Is se unhein apnī k̄hidmat ke lie maḵsūs kiyā jātā thā. Al-Masīh kā matlab hī yih hai yānī wuh jise masah kiyā gayā hai, jis par tel unḍel diyā gayā hai, jo K̄hudā se ek k̄hās kām ke lie maḵsūs kiyā gayā hai.

Mariyam ko yaqīn thā ki Īsā Masīh yih sab kuch hai: Wuh merā bādshāh, merā nabī, merā imām hai. Use yaqīn thā ki yahī al-Masīh hai, wuh hastī jo mujhe mere gunāhoñ se rihā karegā. Jo mujhe Firdaus mein dākhil hone ke qābil banā degā.

Isī hastī ke sāmne ham kis tarah ṭhanḍe dil khare rah sakte haiñ? Jab ham Īsā Masīh ke pakke shāgird ho jāte haiñ tab ham pāgal ho jāte haiñ. Tab us ke pānwoñ mein jhukkar apne bāloñ se unhein poñchhnā ajīb yā nāmunāsib nahīn lagtā. Ham is se ek tīsrā sabaq bhī sikhte haiñ, yih ki

## Apnī Harkatoñ se Kḥushbū Phailāo

Jab Mariyam ne itr unḍel diyā to kḥushbū ghar ke kone kone tak pahuñch gai. Mariyam kī yih harkat chhipī na rahī. Wuh sab par zāhir huī.

► *Ham is se apne lie kyā sīkh sakte hain?*

Jab ham Īsā Masīh ke bāis pāgal ho jāte hain to is kī kḥushbū pūrī duniyā meñ phail jāti hai.

► *Kyā āp is tarah pāgal ho gae hain ki āpse kḥushbū phail rahī hai? Yā kyā āpkī badbū logoñ ko bhagā detī hai?*

► *Dūsra sawāl, kis tarah patā chaltā hai ki ham se kḥushbū phailti hai?*

Is se ki ham Masīh ke pāñw poñchh dete hain. Dhyān deñ ki Mariyam ne sar ko nahīñ poñchh diyā balki pāñwoñ ko.

► *Mariyam ne kyon sar ko nahīñ balki pāñwoñ ko poñchh diyā?*

Poñchhne kā yih kām halīmī kā kām hai. Jo yih kām kartā hai wuh apne āpko sar ko poñchhne ke lāyq nahīñ samajhtā.

Kuchh phūl dekhne mein bahut achchhe lagte hain lekin un ki khushbū nahin hoti. Bahut-se imāndār aise phike hote hain. Un se mālūm nahin hotā ki wuh Īsā Masīh ke shāgird hain.

► *Kyon?*

Unhon ne kabhi apne balon se us ke panw nahin ponchhe. Aise logon ka iman be-mani hai.

► *Panw ponchhna itna mushkil kyon hota hai?*

Panw gande raston par chalte hain, islie wuh dhul aur gand se latpat ho jate hain. Islie qadim zamane mein log kisi ke panwon ko dhokar ponchhne se apni halimi zahir karte the, saath saath wuh dusre ki khas izzat karte the.

► *To aj ham kis tarah Masih ke panw ponchh sakte hain?*

Aj ham zaruratmandon ki khidmat karne se us ke panw ponchh sakte hain. Dusron par raj karna—yih Īsā Masīh ki rah nahin hai. Apne ap ko dusron se chhotā samajhna—yahī Īsā Masīh

kī rāh hai. Kyā yih ek aisī bāt nahīn hai jo us ke bahut se shāgird bhūl gae haiñ? Kyā ajab jab un kī zindagī phīkī aur nākām rah jātī hai?

- *Ab dhyān deñ: Jab Mariyam ne apne bāloñ se apne āqā ke pāñw poñchhkar ḡhushk kie to us ke bāloñ ke sāth kyā huā?*

Apne bāloñ se us ke pāñw poñchhne se yih ḡhushbū Mariyam ke bāloñ meñ bhī ā gai.

- *Jab ham Īsā Masīh ke pāñw poñchhte haiñ to hamāre bāloñ ke sāth kyā ho jātā hai?*

Jab ham us ke pāñwoñ ko poñchhte haiñ to uskī ḡhushbū hamāre bāloñ meñ bhī ā jātī hai— wuh ḡhushbū jo hameñ uskī yād dilātī hai; wuh mahak jo dūsroñ meñ bhī phail jātī hai. Yahī hamārī zindagī kā asl maqsad hai. Ki ham apne āqā kī ḡhushbū dūsroñ meñ phailāeñ.

Ek chauthā sabaq,

## Muhabbat se K̄hālī Soch se Dūr Raho

Itr kī k̄hushbū pūre ghar meñ phail gaī. Sab yih k̄hushbū sūñgh sūñghkar tar-o-tāzā ho gae. Sab k̄hushbū ke jādū meñ ā gae.

► *Kyā sachmuch sab?*

Nahīñ. Ek nāk̄hush huā. Īsā Masīh kā shāgird Yahūdāh Iskariyotī ġhusse huā. Us ne etarāz kiyā, “Is itr kī qīmat chāndī ke 300 sikke thī. Ise kyon nahīñ bechā gayā tāki is ke paise ġharīboñ ko die jāte?”

► *Kyā yih bāt sach nahīñ thī?*

Zarūr. Kuchh bāteñ sach to hotī haiñ magar phir bhī kuchh mauqoñ par ġhalat sābit hotī haiñ. Yih ek aisā mauqā thā.

► *Chāndī ke 300 sikkoñ kī kyā qīmat thī?*

Us zamāne meñ mazdūr din meñ ek sikkā kamātā thā. Ġharz wuh sāl meñ lagbhag 300 sikke kamā saktā thā. Matlab hai yih itr kāfī mahñgā thā. Jo itr Mariyam ne unḍel diyā thā wuh beshqīmat thā.

► *Kyā Yahūdāh ne yih bāt islie chheṛī ki use ḡharīboñ kī fikr thī?*

Nahīñ. Asl meñ wuh chor thā. Jo thoṛe bahut paise shāgirdoñ ko rāste meñ milte the unheñ wuh sañbhāltā thā. Kuchh na kuchh wuh apne lie nikāltā rahtā thā. To bhī kyā uskī bāt durust nahīñ thī? Kyā Mariyam yih itr bechne se ḡharīboñ kī bahut madad nahīñ kar saktī thī?

Īsā Masīh kā jawāb hameñ chaunkā detā hai. Us ne farmāyā, “Use chhoṛ de! Us ne merī tadfīn kī taiyārī ke lie yih kiyā hai. Ḡharīb to hameshā tumhāre pās raheñge, lekin main hameshā tumhāre pās nahīñ rahūngā.”

► *Iskā kyā matlab hai?*

Ḡharīboñ kī madad karnā be-shak achchhā hai. Lekin aisā kām kabhī hamāre dhyān kā markaz nahīñ honā chāhie. Ḳhud Īsā Masīh hamārī zindagī kā markaz honā chāhie. Usī se hameñ sab kuchh miltā hai, aur usī kī muhabbat sab kuchh hai. Yoñ Paulus rasūl farmātā hai,

Agar main apnā sārā māl gharībōñ meñ taqsīm kar dūñ balki apnā badan jalāe jāne ke lie de dūñ, lekin merā dil muhabbat se khalī ho to mujhe kuchh fāydā nahīñ. (1 Kurinthiyōñ 13:3)

Is meñ Mariyam ek achchhā namūnā hai. Wuh hameñ dikhātī hai ki hamārī zindagī meñ sab se ahm bāt kyā hai. Be-shak mazīroñ aur gharībōñ kī madad karnā achchhā hai. Lekin sab se ahm yih hai ki ham muhabbat rakheñ. Ki ham Īsā Masīh ko dekhkar dīwānā ho jāeñ. Ki ham use dekhkar itne pāgal ho jāeñ ki hamārī be-izzatī hone par bhī hameñ parwāh hī na ho. Mariyam ko yih lā-parwāhī hāsil hai. Wuh mahsūs kartī hai ki merā āqā sab kuchh hai. Wuh merī zindagī kā sarchashmā, markaz aur manzil hai. Islie main us ke lie apnī sab se qīmatī chīz qurbān kartī hūñ.

► *Kyā Īsā Masīh sachmuch āpkā āqā hai? Jab āpko uskā khyāl ātā hai to kyā āpke dil meñ Mariyam*



*kā-sā walwalā ubhar ātā hai? Kyā jab uskā khyāl  
ātā hai to āp dīwānā ho jāte haiñ?*

Rahī yih sawāl ki

### **Merā Kyā Jawāb Hai?**

Itne meñ irdgird ke bahut-se logoñ ko mālūm huā ki Īsā Masīh wahāñ hai, aur wuh us se milne āe. Is ke alāwā wuh Lāzar se bhī milnā chāhte the. Yih dekhkar rāhnumā imām Lāzar ko bhī qatl karne kā mansūbā banāne lage. Kyonki uskī wajah se bahut-se log un meñ se chale gae aur Īsā Masīh par imān le āe the.

Ab dekho ki kis tarah ke log Īsā Masīh se milne āe. Kuchh na us ke khyāl, na us ke haq meñ the. Wuh bas tamāshā dekhnā chāhte the. Dūsre use dekhkar imān lāe. Lekin aise log bhī the jo us ke dushman the. Zyādātar rāhnumā us ke dushman the. Kyonki wuh yih bardāsht nahīñ kar sakte the ki hamāre apne log Īsā Masīh ke pīchhe ho lie haiñ. Sawāl yih hai ki āp kyā sochte haiñ? Aisā na ho ki āp Yahūdāh kī tarah hoñ. Uskī tarah jo Marthā

aur Mariyam kī-sī muhabbat nahīn rakhtā thā. Jo ṭhanḍe dil se andāzā lagātā rahtā thā ki mujhe Ustād se kyā fāyḍā milegā. Lekin shāyad āp un logoñ jaise hoñ jo sirf tamāshā dekhne us ke pās āe haiñ.

Ḳhudā kare ki ham sab Marthā kī tarah hoñ jo apnī muhabbat pūre josh se ḳhidmat karne se dikhātī thī. Ki ham Mariyam jaise dīwānā hoñ, jis kī ḳhidmat se kone kone tak ḳhushbū phail gaī.

### **Injil, Yūhannā 12:1-11**

Fasah kī Īd meñ abhī chhih din bāqī the ki Īsā Bait-aniyāh pahuñchā. Yih wuh jagah thī jahān us Lāzar kā ghar thā jise Īsā ne murdoñ meñ se zindā kiyā thā. Wahān us ke lie ek ḳhās khānā banāyā gayā. Marthā khāne wāloñ kī ḳhidmat kar rahī thī jabki Lāzar Īsā aur bāqī mehmānoñ ke sāth khāne meñ sharīk thā. Phir Mariyam ne ādhā liter

ḵhālis jaṭāmāsī kā nihāyat qīmatī itr lekar Īsā ke pānwoṅ par unḍel diyā aur unheṅ apne bāloṅ se poṅchhkar ḵhushk kiyā. Ḵhushbū pūre ghar meṅ phail gai. Lekin Īsā ke shāgird Yahūdāh Iskariyotī ne etarāz kiyā (bād meṅ usī ne Īsā ko dushman ke hawāle kar diyā). Us ne kahā, “Is itr kī qīmat chāndī ke 300 sikke thī. Ise kyon nahīn bechā gayā tāki is ke paise ḡharīboṅ ko die jāte?” Us ne yih bāt islie nahīn kī ki use ḡharīboṅ kī fikr thī. Asl meṅ wuh chor thā. Wuh shāgirdoṅ kā ḵhazānchī thā aur jamāshudā paison meṅ se baddiyānatī kartā rahtā thā.

Lekin Īsā ne kahā, “Use chhoṛ de! Us ne merī tadfīn kī taiyārī ke lie yih kiyā hai. Ḡharīb to hameshā tumhāre pās raheṅge, lekin maiṅ hameshā tumhāre pās nahīn rahūngā.”

Itne meṅ Yahūdiyoṅ kī baṛī tādād ko mālūm huā ki Īsā wahān hai. Wuh na sirf Īsā se milne ke lie āe balki Lāzar se bhī jise us ne murdoṅ

meñ se zindā kiyā thā. Islie rāhnumā imāmoñ  
ne Lāzar ko bhī qatl karne kā mansūbā banāyā.  
Kyoñki uskī wajah se bahut-se Yahūdī un meñ  
se chale gae aur Īsā par imān le āe the.